

清代傳記叢刊·遺逸類⑤
周駿富輯

勝朝粵東遺民錄

四卷附
錄一卷

九龍真逸輯



明文書局印行

臚朝粵東

遺民錄

卷一
陳忠懸介狀一齋

丙辰仲夏
板藏真逸寄廬

070-004

序

辛亥之變九龍真逸棄其圖書宅舍遯於海濱之龍秋龍
秋宋季故墟也桑海易觀異世同感乃纂輯吾粵明季遺
民舊事得二百九十餘人爲粵東遺民錄四卷其自序極
言吾粵人心之正風俗之厚傷今思古有餘痛焉嗚呼此
其由來遠矣溯自廉恥道喪至五季而極士之談節義者
昌於宋盛於明吾粵在宋時被中原文獻之傳訖明而嶺
學大興與中原埒名臣鉅儒先後間出莫不敦崇名教倡
導鄉邦夫粵人自好天性然也居常蹈利則若慙赴義則
若渴其倡導也易爲力重以同志之羽翼師友之講明翕
合類應漸漬成俗故宋崖山之亡也烈士殉於前遺黎勸

於後矣明之亡也桂王西奔吾粵倡義爲牽綴之師同志
響應其敗者沈身隕族瀕九死而不悔其存者間關奔走
亦至萬不可爲而後遜居窮山或溷跡方外以終餘若一
介草茅抗節高蹈者復所在而有視宋之亡加烈焉凡此
皆吾粵數百年來醞釀潛蓄之正氣不幸值世變而於諸
君子一祿之蓋積久而不可遏也如此顧嘗論之風俗者
積而盛者也世變者積而大者也士志不素定不足當世
變世變不一端司馬氏孟荀列傳利爲亂之始一語盡之
顧其傳貨殖也厯舉富世趨利之流並隱居巖穴設爲名
高者屬之又以無巖處奇士之行長貧賤好語仁義者爲
足羞蓋謂語仁義者惟巖處奇士可信而設爲名高者皆

靡靡意未嘗羞貧賤也疾夫利爲亂源而舉世競其中正
言若反意未嘗崇勢利也班氏不察以此相譏人心趨利
苟便其說希通而惡介媮爲而務得夫如是故積漸之久
官常國紀日卽於此窳夫如是故大奸乘其敝得別恣其
邪說詖辭摧毀名教以自便夫如是故趨利者無復顧忌
而古我先哲所恃以正人心維風俗之具塞源拔本掃蕩
無餘士無特操靡靡隨之竊嘗觀於晚近而後歎司馬氏
立言之痛與諸君子志定之可貴又以爲致此極者非一
二人之事一朝夕之故也蓋世變積大而不可測也又如
此然而所謂志定之士往者已矣固無意於身後之傳來
者蒿目世變方自得於山巔水湄亦豈患德孤而援古人

以自壯此未嘗兩相待也兩不相待而兩相感不得已而發憤道之使後之論世者知風俗世變之相爲乘除其養而成之也有因其敗壞而流失也且無止極俯仰今昔蓋有憂焉然則讀此一篇徒歎其采摭之富考證之精未足以知其用心也嗚呼微矣丁巳春二月永晦

序

往讀全謝山鮎埼亭集明季逸民甬上最盛當南都旣覆
浙江屬郡相繼降附獨甯波未下錢忠介倡議抗守諸君
子投袂並起及勢窮力竭相與結爲湖上吟社日抱麥秀
黍離之感以終其身全民生同里閭流風未遠凡所稱述
得之故老傳聞者爲多故其表章易爲力也吾粵當桂王
時陳文忠陳忠愍共舉義師張文烈起兵東莞遠近響應
海濱義民如王興鄧耀陳奇策等所在擁兵咸奉號令遙
爲聲援三公旣殉國難文忠之弟子升文烈之弟家珍尙
侏餘衆力謀恢復廣州再破抗節不變獨漉以復壁之孤
遷徙流離屢瀕於死顧其觀變待時無一日忘故國也思

義之氣萃於一門經百折而不撓而聞風興起以名節相
砥礪者非其門生卽其故舊其他孤臣節士同謀舉事者
讀東莞張氏三疏其人不可悉數事敗以後多能保其晚
節又或草茅韋布未嘗有一命於朝而潔身高蹈誓死不
屈者比比也爰及方外函可函是早歲出家獨能表揚節
義宏暢宗風則宋之杲公同時之南嶽大師也從來忠孝
大節自二三賢者倡導之後遂成爲風會此非其效歟明
季距今二百餘年桑海之交文字散佚稽諸志乘或缺而
不載或載而不詳至於私家著述流傳日少士之懷負殊
異湮沒而不彰者多矣九龍真逸慨然以編輯自任乃蒐
集郡縣各志及 國初諸老詩文遺集旁加攷證凡得二

百九十餘人成勝朝粵東遺民錄四卷然後知粵人氣節之盛尤非甬上一隅可比若其纂述之勤則過於全氏也昔黃太冲謂宋二王立國三年文陸陳謝而外豈無人物今無一傳以爲遺憾篁墩程氏撰宋遺民錄朱錫鬯謂其所收不及什一吉光片羽人猶珍之茲編所錄掇拾於殘編斷簡之餘凡一人一事散見於諸家集中必爲之詳究其本末於以永鄉邦文獻之傳抑一代之瑰行奇節其顯晦固有時也夫古人往矣彼其惓懷君國耿耿未已方屢然引爲內疚豈復計百世之下有人焉表而章之然而天理民彝終古不絕則此潛德幽光之發猶有所與感非細故也嗟乎自新學盛行奸險之徒不惜破壞名教倡爲異


形一
說以便其私而奔走於衣食者又往往不能自固所守巖
穴之士無可共語徒欲求之古人以寫其抑鬱不平之恨
使後之讀者知名教之不容破壞而又懼空言之終無補
也李杲堂之言曰采薇磴磴猶爲末節然則此編之成其
隱痛爲何如也乙卯冬十一月閩道人拜序

序

余與閣公避地海濱閣公喜觀明季隱逸傳竊歎者獻稟
徵所載吾粵遺民寥寥無幾暇因輯此錄以示閣公錄成
因爲之序曰明季士大夫敦尚節義死事之烈爲前史所
未有盛矣哉而嘉遜尤盛當時海內諸大儒若梨洲亭林
夏峯二曲楊園桴亭船山晚村輩未聞有如許魯齋之仕
元者吾粵雖無此魁碩之彥而山林遺逸以今考之凡二
百九十餘人其書缺有間不能得其本末者尙不可更僕
數也蓋明季吾粵風俗以殉死爲榮降附爲恥國亡之後
遂相率而不仕不試以自全其大節其相勵以忠義亦有
可稱者何言之自順治丙戌冬李成棟佟養甲以偏師襲

廣州紹武遇害踰年春成棟復追桂王及於桂林勢將殆矣而粵之陳文忠張文烈陳忠愍三臣振臂一呼義兵繼起於時破家沈族者踵相繼也養甲懼遂令成棟旋師及三臣敗死山海諸義士猶擁殘衆爲復讐計會城之外至於號令不行李佟因是有反復爲明之舉蓋桂王所以延其殘祚者實維吾粵諸臣之力至若何吾騶黃士俊王應華曾道唯李覺斯關捷先等雖欠一死後皆終老巖穴無履新朝者故貳臣傳中吾粵士大夫乃無一人而吾騶士俊以崇禎朝舊相出輔桂王及平靖二王圍廣州桂王西走吾騶猶率衆赴援士俊亦坐閣不去其苦心勤事思保殘局比之貳臣傳中馮銓王鐸等自當有問而此諸人當

時咸被鄉人唾罵至於不齒到今弗衰此亦可見吾粵人
心之正其敦尙節義寢成風俗者實爲他行省所未嘗有
也嗚呼明季去今二百七十餘年耳今何如耶序成擲筆
爲之三歎不已時乙卯孟冬朔日也九龍真逸序



070-016